



Aizawl Khawpui chhung Branch President leh Secretary te kohkhawm an ni dawn.

Branch News

Chanmari West, May 8: Ni 9.5.2011 (Monday) Zan dar 7 hian Central YMA Hall, Tuikhuahtlangah Aizawl khawpui chhunga Branch YMA President leh Secretary te chu Central YMA CEC te nen Emergency Meeting neih a ni dawn.

Naktuk zana meeting neih tur ah hian Branch tin atangin President leh Secretary theuh kal tur a tih a ni a. Mizorama hnamdang (Vai) Mistiri leh Helper te hlawh Ni 13.4.2011-a CCC meeting-in a lo rel tawh bawhzui dan tur chungchang ngaihtuah ho a ni dawn a ni. Hnam dang mistiri-te hlawh hi ni khatah ` 300/- aia tam lo, helper-in ` 150/- tiin CCC meeting chuan a lo rel tawh a ni. Tin, heng bakah hian Mizorama chhunga Bank lem hmanga sumdawng chungchangte leh YMA Kumpuan 'Khawtlang Nun Siamthat' bawhzui dan turte sawiho a ni ang. Central YMA chuan Branch President leh Secretary te kal theuh turin a ngen a, kal thei lo te chu aiawh Branch Office Bearers pahnih tal tel ngei turin a ngenin a hriattir a ni.

Karleh Ni 12.5.2011(Ninga) zan khian Executive Committee neih tum a ni.

YMA Aw man leh Chhiatni Fund khawn mekah, vengchhung miten kan pek that hlawm avangin lawmthu kan sawi a, la pe remchang lo te pawhin a hmalama pe zel turin in ngen e.

Tunkar kalta Ni 3.5.11 zan khan Branch OB meeting neih a ni a, pawimawh tak tak rel a ni

Ni 10.5.2011(Thawhleh) Zan dar 7-hian Zawlbuk Working Committee-te Pu K.Darthantluanga, Chairman Cum Manager te In ah meeting neih tur a ni a, member te kim a kal theuh turin an in ngen.

Pi Lalsangpuii W/o Pu Lalnunthara Sailo (Ex- YMA AW Editor) damlohna avangin Kolkata-ah inentir in an kal a, dam taka an lo haw leh theih nan Br.YMA chuan duhsakna a hlan.

ZAWLBUK WORKING COMMITTEE DIN A NI

YMA in Zawlbuk kan sak mek chu hun engemaw chen chhunzawm tawh loh a nih avangin, chhunzawm leh nise tih rel a ni a. Atul ang leh buaipuii ngaite lo buaipui a hma la turin Branch Office Bearer te kaihhruaina in 'Working Committee' din nise tih Branch Executive Committee in a lo rel angin YMA Zawlbuk sak chhunzawmna turah Branch Office Bearers meeting chuan hetiang hian Working Committee din a ni.

KEIMAHNI

Article lam kan chatlak dawn emaw kan tih laiin, vengchhunga kan innghahna ten min rawn hlui ta malh malh a, kan tilang nghal zung zung theilo erawh in mi ngaih thiamna kan ngen e.

Thangkhat em pawh a liam hma a Pu RK.Malsawma leh Pu Mahluta te nupui nei mi neih ve loh nei ni awm taka an in..... ?? deuh hi chu kan ngaih a bang dawn lo chu a ni e.

- Chairman Cum Manager** : Pu K.Darthantluanga
- Vice.Chairman** : Pu C.Lalzarliana
- Secretary** : Pu Lalrinliana(Tea)
- Asst.Secretary** : Ni Lalramengzami

- Members:**
- 1. Pu T.Ngurkhuma, 7. Pu R.Lalmachhuana
 - 2. Pu Lalthuamluaia 8. Pu VL Thakima
 - 3. Pu K.Lalthakima 9. Pu C.Lalmuankima
 - 4. Pu Lalthanruma 10. Pu Vanlalsawma
 - 5. Pu R.Lalthazuala 11. Pu VL Huma
 - 6. Pu R.L.Thanhnuna. 12. Tv Zothankima(Atea)

Work Supervisor : Pu K.Lalengmawia

SECTION TIN ATANGA YMAAW MAN HMUH DAN :

SECTION	LAK ZAT	AMAN BEISEI	HMUH	PERCENTAGE
Chawngbawla	181	14480	7880	54.4 %
Khuangchera	195	15600	13680	87.6 %
Neuva	127	10160	10160	100 %
Taitesena	227	18160	10560	58.1 %
Vanapa	197	15760	8500	53.9 %
TOTAL	927	74160	50780	68.4 %

PEM LUT

Pu C.Lalrinzuala te chhungkua, E.Lungdar atang a rawn pem. Pu L.Nghakliana 'T' Section In luah. Veng tana mi tha tak an nih kan beisei.



TUN KAR CHANGVAWN

Initsikna leh inelna awmnaah chuan buaina leh thiltihualna tinreng a awm thin. Jacoba 3:16

Dan pawisa lo leh thu awih lo naupang chawi liantu nu leh pate aia ram leh hnam pawikhawih lian zawk hi an awm lo hial awm e. - Robert M.C. Curry

Editorial Board

Editor

RK.Rozidinga
9436142304

Joint Editor :

RK. Malsawmkima
9862578441

News Editor

Tv. Thangkuma
9862303135

Pu Vanlalhluta
9862366308

Tv. Vanlalfawna
9856301975

Cir. Manager

Johny Lalthanpuia
9612359161

Jacob Lalrinsanga
9612319779

Production

Manager
R.Lalmachhuana
9436151817

Branch Office Bearer

President

T.Ngurkhuma
9436190843

Vice President

R.Lalmachhuana
9436151817

Secretary

RL.Thanhnuna
9436152760

Asst. Secretary

K.Darthanthuanga
9436196071

Treasurer

C.Lalzarliana
9436142049

Fin.Secretary

Lalthuamluaia
9612216649

Advisers

Pi Zamanthangi
Pu Vanlalsawma
Pu Rothuama
Pu Lalbiakthanga
Khangte

Nang erawh chu engkimah fimkhur la, hrehawm tuar la, Chanchin Tha hriltu lam hna thawk la, i rawngbawlna kha hlen rawh. II Tim 4:5

Editorial : Mizoram ah hian hnathawh tur hrang hrang a tam a, hnamdang mikhual kan ngah em em na chhan chu kan taihmak tawk loh vang ni ngeiin a lang. Hnamdang ten a an thawh ang te hi Mizo thalaiten mahni inlum atanga kan thawh theih vek a ni a, hnamdang thawh atan ui nachang i hre thar leh teh ang u. Hnam changkang apiangin hna thawh an uar in thawh hreh an nei meuh lo a. Tunlaiin Vai mistiri rate tuksak an ni a, a awm kan tih viau lai hian ngaihtuah chian chu a tha viau niin a lang. Central YMA in a Cement Mistiri hna nasa taka Training a pek te kha tam tak zirchhuak an awm ngei ang. Chutih lai chuan khang ang ho te khan Zoram hi kan chhawk zangkhai thei ta em? tih pawh hi ngaihtuah chian a, nge kan zirna kha kan duh tawk ta mai. Kan tuina ni lo pawh hi kan luhchilh vak thin a, a hmanna turah kan hmang tam tawk lo fo niin a lang.

A pawimawh ber ah chuan hnathawh kawngah kan nun dan thlak phal a ngai. Thatchhiatna hi thawhsan thut ngam a hun tawh. Thalai awlthawng thawveng bawh si inpelh suau suauna ramah hian retheih zel mai loh chu hmabak a awm lo a ni. Tan kan lak a ngai a ni tih YMA memberte hian i hre thar leh theuh ang u.

Article :

DAWN VE TEH

- Laltleipuia

Kan tunlai khawvel changkan zelah hian kan chang kân dan hian rah tha a chhuah mêuh a ngem le.....!!

Nula / Tlangval kan ni emaw, kan inchei dan, nundante pawh zahpui awm loh tak khawtlang thil tihna leh eng emaw nikhua a, fel awm taka lang thin. Mahse, inchhung a rintlakna leh chhawrbawkna awm hauh si lo. In ngaitlawm awm tak a lang chapo ru hle si, kohhran leh khawtlang a in hmang a, sual haw ber awmzia zâng a lang, chhungril lam engmah ni si lo. Chhungte thawh chhuah sa ring a in ti vung ve ringawt, hna thawh tur awm apiang thawk hreh lo mi ni si lo. Thatchhe tawk lek a zir sang, thiamna tak tak nei mang si lo, pianpui B.A nei mang bawh si lo. Mi chal delh run ching kan tam ta hle mai....!

Tuna kan khawvel hi a hmanhmawh tawh vang nge ni...? A chhung a chengte pawh kan hmanhmawhhin kan phili zo ta. Naupangte te

in, nupui / pasal kan in nei ta zung zung mai hi tu mawhphurhna nge ni ang le. Nge ni.....! Nu leh pate hian kan fate kan zilngai lo nge, kan zilngai phak an lo ni tawh lo zawk tih hi in zawh chian theuh a va ngai em aw....!

A chang chuan naupang te te a, nupui / pasal an innei te hi vannei kan ti letling thin. An inneih naupan luat avang a ei ngei sawi tur ka hre bawh si lo. Mahse, dawn an ti sei duh ngei mai....! Ngaihtuah chiang mang lo leh naupang taka an han in thiar lut ta mai thinte, mize in hre chiang mang lo leh ruihtheih thil an ti tih hre chung si a, hmeh, nihna leh sum leh pai vanga nupa a kan insiam mâi thin avang hian chhungkaw buaina leh nupa inthenna a tam phah ta. Hreawm tawrh kan chak leh mang si lo. Heng harsatna hrang hrang avang a kan khawtlang a nuthlawi / pathlawi leng leh an kat tak suau suau avang hian Lalzetluanga anga, "Hei ha hui ha" tih a hlauhawm tih hi lo dawn ve teh.

WORKSHOP ON DISASTER REDUCTION

- Vanlalvuana

Central Y.M.A kaltlanga District Disaster Management Authority, Aizawl District buatsai "WORKSHOP ON DISASTER REDUCTION" Central Hall, Venghlui Aizawl a neihah vengtin atangin Y.M.A. aiawh mi pakhat zel kan tel a. He workshopah hian Dr.H.T.Chhunga leh Pu. Lalliantluanga SP. Wireless MPRO ten hun hmangin Slide Projector hmangin kal khawmte min zirtir a ni.

Chhiatrupna (Disaster) hi kan hnaivaiah engtik lai pawha thleng thei reng anih avangin engtingge kan hmachhawn anga, chia lova kan awm theih ang. Hliam tuar leh tanpui ngaite mumal leh awmze nei zawka tanpui turin engtingge kan tih ang tih hi min zir chhuahpui an tum chu ani. Chuvangin mizaleng in kan tih ve theih leh kan tangkai ve theihna tur ni a ka hriat i han tar lang dawn teh ang.

1. BASIC FIRST AID : Hei hian a tum ber chu chhiat tawhna hmuna hliamtuar tanpui ngai bawhsawm dan tur a ni ber. Chhiattawhna hmuna hian a hnaivai ami te thleng hmasa kan nih thin avangin hliam tuar te chu rangtaka treatment pek anih theih nan an dinhmun a zirin kan dah hrang nghal tur a ni a, dinhmun inanglo taktak an nih avangin rawng hmangin chhinchhiah (triage) tur a ni. A thleng hmasa ber chuan scene report a nei tur a ni. Chhiattawhna

hmunah chuan hmuna hlauhawm lai a awm em tih a enfel nghal bawh tur ani. Kan hnunga lo thleng te leh Medical Team ten engdin hmuna nge a nih awlsam tak an hriat theihna tur a ni. Rawng kan pek dan tur leh an din hmuna hetiang hian lo sawi ila.

a) RAWNG SEN (RED) : Ribbon sen emaw lehkha sen emaw bel hliamtuar a nih chuan rangtaka enkawl (treatment) nghal ngai ani tih hriat tur a ni. Hliamtuar chu dimtakin hmuna him lamah lak chhuah a damdawi in lam panpui nghal tur a ni. Spinal Code chhia a nih chuan a taksa che lo thei angberin buaipui tur a ni.

b) RAWNG ENG (YELLOW) : Hetiang rawng bel hliam tuar kan hmuh chuan hmanhmawh thlak vaklo damdawi in panpui ngai an ni tih hriattur a ni.

c) RAWNG HRING (GREEN) : Rawng hring bel an nih chuan hliam tenau deuh an ni a. First Aid peka tawk mai thei a ni.

d) RAWNG DUM (BLACK) : Heti ang rawng a bel anih chuan chhantur awm tawhlo, a thi tawh tih hriat tur ani. Mahse kalsan mai lovin a lu awm dan tal her rem tur a ni.

Heng rawng hrang hrang kan sawi hliamtuar hi inthlak thut thei reng an nih avangin vil that an ngai ani tih hriatreng tur ani.

(phek 4-na ah chhunzawm a ni)

TAITESENA

Ni 1.5.2011(Sunday) khan Section Committee (Emergency) neih a ni a, YMA AW leh Chhياتni Fund khawn tawh dan Report thlirho a ni. YMA Aw man hi tihfel thawkhat tawh a ni a, Chhياتni Fund hi la khawn zawh loh deuh a ni a, Section chhung a chhungtinte a rang lama pek tum theuh turin committee chuan a ngen takzet a ni.

Nimin 7.5.2011(Inrinni) nileng khan Pu Lalzirliana ten Pathian Chawimawina hun an hman ah section te minrawn ngen angin hnatlanga Ruai buatsaih sak an ni a, he ruai buatsaih na ah hian Section te lawmman tha tak mai min pe leh member thawkchhuak zawng zawngte chungah lawmthu an sawi takzet.

Rokhawlhna dang a awm loh chuan tunkar lo awm tur Inrinni (14.5.2011) zing Dar 8 hian Neuva Section YMA hruaitu te nen High Field-ah Football-a intihhlumna neih a ni dawn a. Hruaitu zawng zawng te (a hmei a pa in) zing Dar 7 ah Pu R.Lalsangzuala te In ah inngahkhawm tur a ni a, kal theuh turin an in ngen.

Chhياتni Fund leh YMA Aw man la khawn fel lo te aranglama khawn fel tur leh khawnsa te Fin.Secretary hnena theh lut thuai thuai turin an in chah nawn leh.

NEUVA

Thawhleleh zan khan Rawra thiara sumtuak hnatlang neih a ni a, inhlawhna siamsaktu Pu Rochhunga te chhungkaw chungah leh ` 100 petu Pu Zonunsanga te chungah lawmthu an sawi.

Thawhleleh zan hian rokhawlhna a awm loh chuan Committee neih tum a ni.

An hruaitu Ricky Lallawmkima Shillong zin pawh damtakin a lo haw leh ta.

Ni 14.5.2011 (Inrinni) khian High Field ah Friendly Match (Football) T-Section hruaitute nen khelthum a ni a, hruaitute lo in la fit theuh tura hriattir kan ni e.

Tunlaimin Section huamchungah Rawlthar khawlaia Zurui leh bengchheng siam thin hmuh tur an la awm chu sim vat turin an in hriattir.

Lalhruaitluanga S/o Lalrochhara Civil Hospital-a awm leh Pu Michael Lalhriatpuia, Pu Lalrinliana Pautu damlo inlama in enkawl mekte an dam that leh thuai an duhsak.

KHUANGCHERA

Indoor Stadium-a Volleyball khelthum na a Thingpui dawr siam phalsak tu ADVA leh CWSC hruaitute chungah lawmthu an sawi a. Section hruaitu thahnemngaia thawkchhuak thin zawng zawng te chungah lawmthu an sawi. A bik takin Pi Kimi W/o Pu Pachhunga, Pi Mabiaki W/o Pu Zarzova leh Pi Mami W/o Pu Thangliana te thahnemngai taka anrawn hnatlang thin chu an lawm tak meuh meuh a ni.

Thingpui dawr a hman tur Bungrua hawh tirtute chungah lawmthu an sawi a. Gas ngaihtuhsak tu an hruaitu hlui Pu Lalfakzuala chungah pawh lawmthu an sawi mawlh mawlh.

An hruaitu Tv.Laltlankima'n Fireman hna a hmuh thar lawm nana hruaitute chawhlui a buatsaihsak chu an lawm hle. Midang te pawhin lawmthu sawi hi uar deuh deuh nise an ti.

Section Bungraw hawhtuten a dahna tur hmunah fel taka rem leh thin tur a ni.

Chhياتni Fund Target chu an tlak tawh a, khawn hmabak khawn zel turin a buaipuitute an ngen.

LOCAL COUNCIL NEWS

Sanitation Deptt. atangin bawlhhlawh paihna turin thla khatah ` 40000/- hmuh a ni a, Local Council chuan hei aia felfai zawk a paih turin hma a la mek a ni. (*Kar hmasa khan a sum zat ` 4000/- kan lo ti palh a, ` 40000/- zawk tur khi a ni e. Tihswal palh ah ngaihdam kan dil e.*)

Bawlhhlawh paih dan tur chungchang hetiang hian siam a ni.

Kar khatah wavi 3 tlain hetiang hian : Thawhtan : Zingkarah hmar lam atanga tanin V-Section Pu Runa Mual atanga tangin vengchung point hrang hrangah khawn a ni ang.

Nilaini : Zingkarah N-Section atanga tanin vengchung point hrang hrangah khawn a ni ang.

Zirtawpni : Zingkarah hmar lam atanga tan leh in V-Section Pu Runa Mual atangin vengchung point hrang hrangah khawn a ni leh ang.

V-Section mawnglam Pu Thangfala in bawr vel te tan Pu H.Lalrawna Point ah motor lo chan thin tur a ni ang. Tin, Pu FLala In bawr chu Pu R.Kawlkunga point-ah bawlhhlawh paih motor lo chan tur a ni ang.

(Local Council News chbunzawmna)

Bawlhhlawh paihna point siam ang hian a point-ah chauh zel paih tura ngen kan ni a, kawng lakah tumahin lo paiha lo pharding lo turin veng mipuite Local Council chuan a ngen takzet a ni.

Pu Rokhuma, CH-Section te chhungkua chuan Local Council te ngenna ngaipawimawh in Garrage tha tak an siam a, an chungah lawmthu an sawi.

Pu Rokhuma In inkar atanga Pu H.Lalrawna In inkarah Motor kalna dalin tumahin motor eng chi pawh dah loh tur a ni a. Dah lui kan awm a vanduaia thil a engemaw tihpalh a lo awmin engmah an sawi buai thei lovang.

Chanmari West huam chhunga In sa tur reng rengin Local Council hriattir zel tur a ni.

Bawlhhlawh paihna tur Point hrang hrang te hetiang hian siam a ni :

1. Zuangtui khur.
2. Salvation Biakin kawt.
3. Pu Dengthanga kawt.
4. Pu Thanhawla kawmthlang.
5. Pi Biakhluni kawt.
6. Pu Zothansanga kawt.
7. Pu R.K.Daniel-a kawt.
8. Pu Lalzirliana kawt.
9. Pu H.Lalthlamuana kawt.
10. Pu Sapa kawt.
11. Pu J.Kapthianga kawt
12. Pu Lalmalsawma (Sena) kawt
13. Pu P.Zakhuma kawt
14. Pu Thara (RO) kawt
15. Pu Kawlramvela kawt
16. Pu Lalchungnunga (L) kawt
17. Kawngkawipui
18. Pu Ramparliana kawt
19. Pu R.Kawlkunga kawt
20. Pu Runa Mual
21. Pu H.Lalrawna kawt
22. Pu C.Rozama kawt
23. YMA Park
24. Pu Roliana kawt
25. Pu Kapthanga (L) kawt
26. Pi Siamthangi kawt

ZCC NEWS

Ni 28.5.2011 (Thawhleleh) a Mizo Kutpui, Reiek a neih turah programme neih tum a ni.

Ni 5.5.2011(Ninga) khan Sporting Club hruaitute nen Sipai Lammual-ah Football match ropui tak an khel a, he friendly match ah hian 4-3 a chakin tlaiah CWSC hruaitute nen ZCC President te In ah chawhlui an kilho nghal a ni.

Memberte leh hruaitute thahnemngai taka lam zir tur leh lam zirngai pawimawh theuh turin an in ngen nawn leh.

(Workshop on Disaster Reduction report phek 2-na a mi chhunzawmna)

Hliam tuar chu a marphu (120/min chin chunglam) a ran viau a. athawk a ran bawka, a dang viau anih chuan a dinhmun a thalo ani tih hriattur a ni a, hmuh mai theihah hliamtuarlo mahse Internal Bleeding a awm tih hriattur ani. (Bleeding a neih leh neihloh hriatna awlsam chu a kut hmawrah hmetin hmehnalai dang chu second hnih chhungin ngai a awm leh hman tur a ni). Hliam tuar dang aia buaipui hmasak a ngai. Ruh tliak a ni chuan hmawlh leh thil dang rem chang hmangin them (Splint) dawh emaw cher khawng tur a ni. Thi chhuak nasa a nih chuan tawn khalh (Tourniquet) tur a ni. Tawn khalh nan hian Bandage / puan them inchi hnih a hlai in wavi khat suih a hmawlhthe daha suih leh tur a ni a, thi chhuak tawp hma herh tur a ni. Minute 15 hnuah phelthawl thin tur a ni.

2. CROWD CONTROL AND LAW & ORDER :

Crowd tih hi mipui pung khawm sawina a ni a. Chhiat tawhna hmuna mipui pung khawmte hian hnathawktute kan dal thin avangin thunun (Control) a ngai thin a ni. Mipui avangin nunna chanlo turin nunna an chan phah thei a bungraw hlu tam tak chhelo tur a chhiat phah thei a ni. Tlawmngaia thawk chhuakte phena ruk tur lo zawng te, mahni ngaihdan anih loh avanga mipui fuihpawrhthe, chhiatna dang thleng thei a awm thin avangte, chet velna tur hmun thawl mamawhna avangin mipui thunun a pawimawh thin hle. Mipui pung khawmten kan hriat tur leh kan zawm

turte tarlang i la.

a) Chhiat tawhna hmuna a kal ten Khawtlang Hruaitu Local Council leh YMA hruaitu leh hetiang lama tawn hriat lo nei tawh emaw training lo nei tawhte kaih hruaina zawm thiam a tha. Khawtlang Hruaituten kal khawmte hriattur puan chhuahna Information center buatsaih vat tur ani. Mipuite hi hriat duh neia pungkhawm an ni tih hriat reng tur a ni.

b) Hmun hlauhawm lai kal lohna tur an siam laiah kal luih loh tur ani.

c) Mipui kalkhawmte awmze neilova awmkhawm mai lovin tlar fel tak siam thuai tur a ni. Mahni remchan dan anga bungraw seng hawi ngaite lak mai hian hmuna duh zauin kan in dip thei a ni. A bik takin hmuna remlo laiah phei chuanrangtakin tlar (queuing) hi siam vat tur a ni.

d) Kangmei chhuahna hmuna mipui pungkhawm avangin harsatna a thleng thei a. Fire department motor rangtak a thlen theih nan motor kawng dalin mipui awmlah tur ani a. Lirthei leh thil dang Fire motor dal thei tur a awm chuan rang taka senghawi thin tur a ni.

e) Police leh Rescue team an lo thlem toh chuan an kaihhraina zawm hi kan tih turin a ni.

Heng kan tarlan bakah hian tih tur tamtak a awm a, kan sawi vek seng lovang. Kan tarlan chin ngawt pawh hi kan zawm that chuan kan tangkaipui viau in a rinawm hle a ni.

HETAH HIAN SMS LA

>>9774170328<<

☞ Kan vengchhunga motor a chak tak taka tlan thin te hian sim vat tum teh ang u. Ke a kal te tan a thlamuan thlak lohthe a nia, tin, motor kian tha duh lo te erawh kha chuan in enfiah a va ngai thung ve.

977449_09

☞ P Street a tlai lama lo awm thin ho kha mi kawng kal lai ti buai tawh suh u. Kha tia in tih buai khan in thin zia a lang a nia.

986275_76

☞ Zuangtui bul Street Light hi Local Council te hian a tih en theih dan an hre lo maw. Helai hmuna hi a pawimawh si a.

977497_80

☞ Ka mawng fual dan te, ka ngal kual vang te, ka kap kau vang te, ka thau vang te in saidawium a letling zawnga tun ka an dan tur leh ka nalhpui loh tur zia inhriain kekawrtlawm zuih hak chin lai khan zuih lutuk ka ha ve duh lova, a arh an chin lai pawhin arh vak lo ka ha ve mai. Tun thing min ti lem hauh lo nia. Tunlaia nula pawh hi ni ila inhme lo fe a leggings hak ai chuan ha lo a THING LO nih ka tum zawk tho ang tih ka chiang.

961552_21

(Kan inchei duh dan hian kan mizia a pho lang an tih kha maw...)

(SMS kan dawn te hi Ed. Bd ngaihdan a ni vek kher lo)

Infiamna lamah thil lian pathum

Tun pathiannah hian thiltih tur tam tak a awm a, Mizo kristiante tan chuan a pawimawh hmasa ber chu biak ina kal a ni. Infiamna khawvel zau takah thil thleng tur tam tak a awm laiin, thil lian tak tak pathum a awm.

Zing dar kua velah MGM Grand Garden Arena, Las Vegas-ah Manny Pacquiao leh Shane Mosley an inhnek dawn a, Pacquiao-an 2009-a Miguel Cotto-a kawllai a laksak WBO welterweight title an inchuh ang.

Inhnek tur fighter pahnihte hi inkhan lo deuh tura ngaih an nih laiin, a boruak erawh a lian viau. Kum 32 mi Pacquiao hian 2005 khan Eric Morales a hneh lo va, he mi hnu hian tlawm nei lovin wavi 13 a chak zawn mek a, Morales hi tum hnih hnek nawn lehin a knockout ve ve. Hmuhnaawm tak leh thiam em ema inhnek thin a nih avangin Pacquiao hi boxing chawikang lehtu ang hiala sawi niin, boxing-a mi ropui bera an chhal Muhammed Ali nen an khaikhin a, mi thenkhat chuan Filipino world champion hi an dah sang tawh zawk.

Tawngkam chhia leh dengkhawng ber ber hmanga tumpui turte ngeiawm tak taka vau beh ching chhuaktuah Ali

an ngai a. He mi letling chiah hian boxing-ah zahawm takin a inlan theih a ni tih Pacquiao chuan a entir ve thung. Tawngkam bawllahlawh leh ngaihtlak nuam lo a hmang ngai lo va, weight then hrang pariatah world champion a ni thei tho va, tawng vak vak an huaiin an chak kher lo tih lantirtu lian tak chu Pacquiao a ni a, kum 39 mi Mosley pawh zahawm takin a dawr a, a sawi nep duh lo.

Vawiin tlai dar 5:30 hian Istanbul-ah Turkish Grand Prix an tlan dawn. 2011 F1 season-a Europe-a an tlan hmasak ber tur a ni. Kumin atangin Pirelli tyre hman a ni a, kum dang aiin tyre-in thil a tithei a, ruahmanna siam fuh a ngaih avangin an tlan hnuhnun ber China-ah pawh team an talbuai nasa a, intlansiak a hmunnawm phahin Turkey-ah pawh a hmuhnaawm leh hle tura ngaih a ni.

Zanin dar 8:30-ah Manchester United-in Chelsea an mikhual dawn a, Premier League champion tur chinfelna a ni thei ang. Khelthum an la neihah United-in hmahruin point thumin Chelsea aiin an sang a, goal difference-ah an inang chiah. United an chak chuan khelth hnih an la neihah point khat chiah an mamawh dawn a, an inhnehtawm

i-One Multi-Brand

TV + USB support, LCD/LED + Tata Sky free, Washing Machine, Fridge, Inverter, Microwave Oven, Fire Extinguisher tha leh tlawm kan nei e. SCOOTY leh LCD 32" man theihna Coupon kan pe tel bawk.

i-One Multi-Brand Vaivakawn

Near : Zotlang peng
Ph:9862492830

(4-3)

pawhin result tha a ni pha tho. Chelsea an chak chuan United nen inzat chiahin, an chakna letin goal difference-ah an sang dawn a, hma an hruai ve thung ang. Team pahnihte hian team lian dang khelth tur an neih tawh loh avangin a chak zawk hi champion thei tura ngaih a nih laiin, Chelsea erawh chak pawh ni se an dinhmun a la chiang lutuk lo va, chutih laiin United lakah chak ngei an mamawh.